

四庫全書

史部

欽定四庫全書

史部

西湖志纂卷二至

詳校官左都御史臣李紱

編修臣程嘉謨覆勘

總校官進士臣朱鈐

校對官主事臣盛惇崇

謄錄監生臣王志遠

欽定四庫全書

西湖志纂卷二

大學士梁詩正等輯

西湖水利

西湖古稱明聖湖漢時金牛見湖人言明聖之
瑞因名又以其在錢塘故稱錢塘湖又以其委
輸於下湖故稱上湖其地負會城之西故通稱

西湖

漢書地理志錢塘有武林山武林水所出
水經注錢塘縣南上側有明聖湖父老傳

言湖有金牛古見之神化不測湖取名馬咸淳
臨安志武林水自四山而下合流於明聖湖即
今之西湖也西湖遊覽志西湖三面環山豁谷
縷注下有湖泉百道潄而為湖諸山之脉皆宗
天目蛇蟠東來若翔若舞萃於錢塘而峭崿於
天竺從此而南而東則為龍井為大慈為玉岑
為積慶為南屏為龍山鳳山吳山皆謂之南山
從此而北而東則為靈隱為仙姑為履泰為寶
雲為巨石皆謂之北山南山之脉分為數道貫
於城中而其外邇則白龍山沿江而東環沙河
而靈骨於茅山艮山者皆其護沙也北山之脉
分為數道貫於城中而其外邇則自霍山繞湖
市半道紅衝武林門露骨於武林山皆其護沙
也潮擊海門而上晝夜再至山奔水導而逆以
海潮則氣脉不解南北諸山崢嶸迴繞為西
湖洩怒停深若練若鏡其水灌溉沿湖之田形

勝關乎郡城餘波潤於下邑豈
立為魚鳥之藪遊覽之娛哉

歷代開濬始末

唐代宗時李泌刺杭州憫錢塘瀕海市民苦江
水涵惡難以安土始鑿六井開陰竇引湖水以

資民汲民甚利之

唐書李泌傳代宗時泌為常
衮所忌出為杭州刺史有風

績咸浮臨安志六井相國井在甘泉坊側西井
在相國寺前方井在三省激賞酒庫西白龜池
水口在玉蓮堂北小方井在錢
塘門內裴府前金牛井今廢

長慶初刺史白居易重修六井甃函筧鍾洩湖

水漑瀕河之田

唐書白居易傳居易雖進忠不見聽乃句外遣為杭州刺史始

築隄捍錢塘湖鍾洩其水漑田千頃浚李泌六井民賴以汲白居易詩耆老遮歸路壺

漿滿別筵甘棠無一樹那得淚潛然稅重多貧戶農饑足早田惟留一湖水與汝救荒年自注

今春增築錢塘湖隄貯水防旱故云

五代時西湖歲久不修湖葑蔓蔽吳越王錢氏

置軍千人治湖又疏湧金池以入運河

宋史河渠志錢

氏有國始置撩湖兵士千人專一開濬夢梁錄湧金池在豐豫門內引西湖水為池吳越王元

璣書湧金池三字刻石識之

錢氏歸命後廢撩湖兵士湖復不治宋景德初

王濟以工部郎中知杭州命工開濬

宋史王濟傳郡城西

有錢塘湖溉田千餘頃歲久湮塞濟命濬治增置斗門以備潰溢之患仍以白居易舊記刻石

側於

天禧時王欽若奏請西湖為放生池禁民採捕

慶厯時湖葑日塞鄭戩知杭州復濬之

宋史鄭戩傳慶

厯元年戩知杭州時錢塘湖葑土湮塞為豪族僧坊所占冒湖水益狹戩發屬縣丁夫數萬闢

之事聞詔本郡歲治如戩法

嘉祐中知州事沈邁作南井以補金牛之缺人

稱沈公井

咸淳臨安志沈文通嘗作南井引西湖水入城以便民汲人呼為沈公井

按南井在三橋西金文河酒庫北水口在豐豫門外龍王堂前分入宋史沈邁傳邁知杭州明

於吏治令行禁止

禁民捕西湖魚鼈

熙寧中六井及沈公井俱廢知州陳襄命工討

其源流潔而蠶之歲旱不能為害

咸淳臨安志杭雖號水鄉

而其地斥鹵可食之水嘗不繼唐相國李長源
舊為六井引西湖以飲民井久廢不修水遂不

應民用襄命工討其源流潔而蠶
之井遂可食雖遇旱歲民用沛然

元祐四年龍圖閣學士蘇軾知杭州奏請救荒

餘錢萬緡糧萬石及百僧度牒募民開湖葑草

盡除湖乃大治

宋史蘇軾傳西湖葑積為田漕河失利取給江湖舟行多淤三

年一淘為民大患六井亦幾於廢軾見茆山河專受江湖鹽橋河專受湖水遂濬二河以通漕復造堰牆以為湖水蓄洩之限以餘力完六井又取葑田積湖中南北徑三十里為長隄以通行者吳人種菱春輒芟除不遺寸草募人種菱湖中葑不復生歲取其利以備修湖杭民家有畫像飲食必祝又作生祠以報

南渡後郡為行都衣冠畢會商賈雲集雖無恢

復遠略而言水利者歷朝多有紹興初守臣張

澄請開西湖繼守臣湯鵬舉奏請重開均著治

績宋史河渠志紹興九年知臨安府張澄奏請
措置兩軍兵士二百人委錢塘縣尉兼領其

事專一濬湖若包占種田沃以糞土重置諸法

從之歲淳熙安志紹興八年澄再知臨安府五

月浚臨安府運河紹興十九年以西湖近來穢
濁湮塞詔郡守湯鵬舉措置遂用工開撩及修

砌六井陰竇水口增置斗門閘板量
度水勢通放入井且條具事宜以聞

乾道時臨安居民日盛河流漸隘舟楫病之安

撫周宗請開運河濬西湖重修六井一倣蘇軾

遺法

宋史河渠志乾道四年守臣周淙出公帑錢招集游民開濬城內外河疏通淤塞人

以治辦稱之咸淳臨安志淙言西湖惟務深濶涓淨累降指揮禁止汙穢今欲撩湖增置軍兵百人專委錢塘縣尉并壕寨官一員於階位內帶主管開湖管轄軍兵不住開撩不許妄有請佃包佔或有違戾依蘇軾申請以違制論從之

淳熙時張杓知臨安興水利不避權要治法略

如周淙

咸淳臨安志淳熙十二年張杓以兩浙轉運副使知臨安府置修江卒以禦潮

疏積年湖壅三閘六井一一修復十六年杓以權兵部尚書再兼知臨安府時有內侍毛伯益占西湖菱池為亭資緣求免杓曰吾官可去法不可屈執奏論如律

淳祐咸淳間以治水著者守臣為趙與憲為潛說友御史為鮑度相繼開浚宋之世湖無壅淤

之患

夢梁錄淳祐丁未大旱湖水盡涸郡守趙與憲奉朝命開濬自六井至錢塘上船亭

西泠橋北山第一橋蘇堤三塔南新路長橋柳洲寺前等處凡種菱荷菱蕩一切雜去湖水如舊咸淳四年守臣潛說友申請於朝乞行拆除湖中菱荷無得存留穢塞侵占湖岸又咸淳中御史鮑度劾奏內臣陳敏賢劉公正包占水池蓋造屋宇濯穢洗馬無所不施一城黎元俱飲污膩濁水而起疾疫之災奉旨降官罷職令臨安府拆毀屋宇開闢水港於湖中除拆蕩岸得無污穢之患并令官府除其年納利租官錢消滅其籍

有元一代守令治西湖者無人湖遂廢而不治

故元史河渠志不及西湖

元史世祖本紀至元二十五年二月辛巳

以杭州西湖為放生池二十八年弛杭州西湖魚鳥禁聽民網罟成化杭州府志元時不事濬湖沿邊泥淤之處沒為菱田荷蕩屬於豪民湖西一帶蘄草蔓合侵塞湖面如野陂然

至正六年丞相托克托率達實特穆爾開候潮門

以南運河及龍山河

明初仍元之舊西湖漸成平田遂起稅額向稱

以山為岸者去山日遠

成化杭州府志西湖百餘年來居民寺觀占為

已業六橋之西悉為池田桑埂裏湖亦然中僅一港通酒船耳孤山路南東至城下直抵雷峯

塔迤西

皆然

景泰七年六月鎮守浙江兵部尚書孫原貞建

議築修西湖二閘明臣議開西湖自原貞始

成化中官兩浙者自都御史至郡守每議興西

湖水利雖或格於浮議或設施未竟而前作後

承漸見功緒

萬厯杭州府志正統後都御史劉敷御史吳文元奏請復西湖而浮

議蠶起有力者百計阻之西湖遊覽志成化十年郡守胡濬稍闢外湖成化杭州府志成化十

二年湧金門北創開水門通導西湖水自柳洲寺後入城由曲阜橋達城河門深四丈五尺高九尺置鐵憲樞障隔內外門內外各為橋上並闕一丈下闕視水門而高則減二尺外橋下又為開板以防暴漲以

成化十九年都御史劉敷等清理續占

李旻潘治西湖

議成化十九年巡視都御史劉敷用杭人通政何琮之言會同都布二司臨湖查勘凡宣德正統等年團築報稅者一切鋤而去之稅糧百三十餘石派之隄西有產之家代納

弘治十二年御史吳一貫修築石堰

李旻修復石堰記見

藝文

弘治末正德初楊孟瑛守郡建議西湖當開者
五陳之御史車梁請達於朝從之發帑藏役人

夫毀田蕩除額稅雖謗怨者多而有明開濬之

功以孟瑛為最

楊孟瑛奏議見藝文萬厯杭州府志正德三年郡守楊孟瑛銳

情恢拓力排羣議言於御史車梁僉事高江上
疏請之部議報可乃以是年二月興工為傭一

百五十二日為夫六百七十萬為直銀二萬三
千六百七十兩拆毀田蕩三千四百八十一畝除

豁額糧九百三十餘石以廢寺及新墾

田糧補之自是西湖始復唐宋之舊

嘉靖時禁侵占西湖者為御史傅鳳翱龐尚鵬

萬厯時郡人陳善作杭州府志建䟽通之議

西湖

遊覽志嘉靖十八年巡按御史傅鳳翱行縣清
理占據四十四年巡按御史龐尚鵬刻碑清波
湧金錢塘三門嚴為禁防萬厯杭州府志龐尚
鵬立石禁約西湖開築以來積數百年矣前人
用情於此非徒采形勝資燕遊實為廣蓄洩以
備旱潦抗民世其利至今頌之不衰往緣豪右
侵占淤塞已經前院勒石示戒歲久法弛蠶食
如故特行立石禁諭凡有官族豪民仍行侵占
及已占尚未改正者許諸人赴院
陳告 陳善請䟽西湖議見藝文

天啓四年錢塘縣令沈匡濟議䟽填闕之水以

清湖八議上之撫按未見施行

沈匡濟清湖
八議見藝文

皇朝開濬盛典

順治十一年六月二十二日欽奉

恩詔內開

一東南財賦重地素稱沃壤連年水旱為災民生重困皆因失修水利致悞農功該督撫責成地方官悉心講求疏通水道修築隄防以時蓄洩俾水旱無虞民安樂利

順治間浙江左布政使張儒秀立西湖禁約凡豪

民占為私產者勒令還官

康熙二十四年巡撫趙士麟開浚城中河道凡
河之已塞而全䟽者起清波門三橋址歷迴龍
橋衆安橋以南循中宮橋又西北循梅家橋凡
十二里其流淺而加濬者起湧金水門歷洗馬
橋烈帝廟北循武林門南抵正陽門又南抵南
新關凡二十五里費白金二萬餘兩役夫二十
餘萬工起康熙甲子十一月訖工於乙丑六月

康熙二十八年歲在己巳春

聖祖仁皇帝履懷澤國軫恤羣黎

特舉省方之典

巡幸至浙駐蹕西湖

御製七言詩一首并序

宋臣蘇軾開湖溉田築隄瀦水杭民利之爲政者
不當如是乎

長隄十里跨湖波官柳青青覆軟莎漫道只爲遊賞

地懸知布政在民和

閏己卯癸未乙酉丁亥之歲屢奉

南巡皆

臨幸駐蹕官民踴躍忭舞恭先濬治西湖闢孤山以建
行宮並䟽湧金門城河以達

御舟雲山効靈湖波增潤漢稱明聖之瑞千古協應
蓋自有西湖以來未有若斯之盛者也

康熙四十六年十二月十四日工部奉

上諭朕宵旰勤民視如赤子無一時一事不思為閭閻
圖經久之計江南浙江生齒殷繁地不加增而仰食
者日衆其風土陰晴燥濕及種植所宜迥與西北有
異朕屢經巡省察之甚悉大抵民恃田畝為生田資
灌溉為急雖東南名稱水鄉而水溢易泄旱熯難支
夏秋之間經旬不雨則土坼而苗傷矣濱河低田猶
可戽水濟用高仰之地力無所施往往三農坐困朕
茲為民生再三籌畫非修治水利建立閘座使蓄水

以灌輸田疇無以爲農事緩急之備江南省蘇州松江常州鎮江浙江省杭州嘉興湖州各府屬州縣或近太湖或通潮汐宜於所有河渠水口度地建閘隨時啓閉水有餘則宣洩之水不足則滯蓄以備用其有支河港蕩淤淺者宜并加疏濬使引水四達仍行建閘多蓄一二尺之水即田高一二尺者資以灌漑矣多蓄四五尺之水即田高四五尺者資以灌漑矣行之永久可俾高下田畝無憂旱潦此於運河無涉

而於民生實大有裨益今漕運總督與江浙督撫方料理截漕散賑爾部速移文該督撫等令將各州縣河渠應建閘蓄水之處並應建若干座通行確察明晰具奏爾部卽遵諭行特諭欽此本年十二月浙江巡撫王然接准部咨欽遵檄行杭嘉湖三府確勘查議隨據杭州府知府張恕可詳稱杭屬錢塘縣西湖有湧金水門引湖水入城周流曲折歸於海寧地界湖北聖塘閘洩水於濠河流至

新河壩其減水石堰二閘之水由桃花港入於
餘杭縣界流於大河可資灌溉今桃花港淤淺
約長三里應行開濬其餘西湖通水諸處皆有
舊閘可考勸率沾利農民勤加保護疏通以資
田疇其支河港蕩有淤淺者令及時開濬等因
詳覆會同福浙總督具題部議覆准杭嘉湖三
府共建閘六十四座所需銀兩移咨戶部撥給
西湖通水諸處支河港蕩令該管有司將淤淺

處所勸諭民間相時開濬可也奉

旨依議去歲杭州等處被災民生疲敝今支河港蕩內淤淺者若勸民開濬地方官員或藉此私派害民亦未可定著動正項錢糧疏濬欽此欽遵部咨到院行司四十七年十月浙江布政司為欽奉

上諭事今將奉

旨察勘河渠水口應行建閘疏濬處所并奉

旨著動正項錢糧疏濬支河港蕩造冊詳報

題請核銷

雍正二年二月初五日

世宗憲皇帝特念地方水利關係民生最為緊要

勅令工部查議浙江西湖年久並無疏濬應行該督撫

確勘具題本年六月福浙總督覺羅滿保會同

浙江巡撫黃叔琳題為請開水利以贍民生以

裕

國計事該臣等會看得杭城地當省會附郭之縣

仁和在東北錢塘在西南自仁和而迤東則為海寧三縣田畝數萬頃全籍城中上下兩塘河水灌溉而兩河之水源則皆自西湖所流注者也湖居省城之西聚南北諸山之水匯七十二泉之源潄而為湖舊志周圍三十餘里水由湧金門入城紆迴環曲而出於錢塘武林艮山諸門其出艮山門者入上塘河由臨平而達於海寧出錢塘門者由三閘而至松木場桃花港與

武林門之水共注響水閘凡湖墅支河與古蕩
西溪沿山十八里之田皆資其利有餘之水歸
入下塘河而仁和北鄉以及錢塘之下八鄉實
沾蔭焉此西湖水源出入之大槩唐臣白居易
所謂每放湖水一寸可溉田十五頃每一復時
可溉五十頃若蓄洩及時則瀕湖千頃可無饑
歲者此也然西湖之所以灌溉利溥者由湖界
直接山脚沿湖諸山之水暢流入湖而無所壅

過一由山水所來要口俱設小閘以阻浮沙使
之不能淤塞一由上塘五十里外臨平鎮之西
南有東湖即古臨平湖以為之停蓄故其來也
有源其去也有歸含泓蘊涵而無涸竭之患無
汎濫之虞則西湖與上河東湖其利害實相為
表裏者矣自明季來各閘廢壞而沙土多淤繼
且并其淤者而聽佃於民則山與湖隔絕而西
湖之源不能充裕上河淤淺東湖壅塞則水無

容納而西湖之流不能停蓄源流既損而湖利遂微三縣之田旱不兼旬卽憂枯槁由來久矣

我

皇上宵旰憂勤凡利益民生之事無一不履

聖懷况開濬水利所關甚大 臣等奉

命詳慎查勘謹按西湖舊志三十餘里有先被民人占為田蕩於康熙三年丈入魚鱗圖冊者計四百四十二畝零每年共徵糧銀二十兩七錢零共

徵糧米一十五石五斗零其田埂內種植桑柏
樹共一萬九千三百三株并蕩內栽荷蓄魚等
項管業之家每年約收租息銀三百四十四兩
零又未經丈入魚鱗圖冊者計二百一十八畝
若較額征之數每年亦止銀十餘兩米七石餘
斗其田埂內種植桑柏樹共八千四百七十七
株并蕩內栽荷蓄魚等項管業之家每年約收
租息銀一百二十三兩零此項田地原屬官湖

漸為民占在亘塞湖心者固為妨礙水道即去湖較遠者亦皆阻遏水源况所納於官者每年僅銀三十餘兩米二十餘石即所利於民者每年亦止花息銀四百九十三兩零其為官民利益者甚微而所損於三縣民田者實不止於鉅萬今荷

聖恩軫念民生修復水利所當仰請

皇仁詔除糧額照西湖舊址盡行清出歸湖去其埂

塞開通水源以貽萬世無窮之利其從前所種桑柏等樹或移植於附近堤岸或移植他處以收花息各聽民便至現存湖址二十二里四分有奇通計裏外湖面一萬一千三百一十五畝零淤淺硬沙葑灘共三千一百二十二畝應將淺涸者挑深淤塞者開濬芟除葑草以復故址而暢湖流其次序則先裏湖而後外湖先硬土而後葑灘其深淺則或五六尺三四尺各就湖

面形勢分別挑濬其淤泥葑草則雇用小船搬
運幫築於各舊堤之上加闊加高以堅堤址其
保護則沿堤釘椿編竹不使淤泥坍入湖中裏
湖各橋建閘啟閉不使沙土流入湖內其委任
則令鹽驛道率同府縣佐貳實心料理其工費
則令布政司會同鹽驛道將府縣原估再加丈
勘節省確估造冊詳送撫臣核明具

題請

旨酌動海塘捐監銀兩於今年秋成後興工撫臣就近
不時查看督率俟工成之後即交鹽驛道每年
查看照管俾永遠不致淤塞如此則西湖之水
無憂涸竭而仁錢海三縣民田旱澇有備億萬
小民受益無窮於

國計民生實有裨益矣至於杭郡城內之河共有
數道一為中河一為東河一為小河而小河又
有中西北之分前人設寬鑿溝引西湖之水自

湧金水門及流福溝而入城北出武林水門南
出正陽水門東南出候潮水門復由正陽候潮
門外合流而趨永昌壩以供南權之抽分通北
權之商貨再進而入清泰水門落水於新壩以
疏抽分之竹木又溢於會安壩而入艮山水門
以通東路之糧食場竈之鹽船其曲折出入凡
三十里然後由桃花港響水閘會流於上下兩
塘河以灌漑田畝是城河正所以通西湖之血

脉而利益商民者無限城河淤塞則湖水無由
出入兩河亦隔絕不通今當相其淤淺處酌量
開濬附入工費項內報銷其城外上塘河一帶
由省城而直達海寧凡一百二十里沿河民田
地蕩數千頃各有閘壩旱則閉以蓄水澇則開
以分入下塘實為河之下流今河身支港亦多
淤塞則下流不暢不能引湖水而注之仁海但
地方甚為寬廣應責成沿河各縣勸諭有產沾

利之家趨狄成農隙業主出給口糧佃戶以身
作工漸次開濬民分其任官董其成但加督率
而不由胥役經手則衆擎易舉工可速成矣若
東湖為仁和海寧二縣分轄考之於志仁和載
周圍十里海寧載東西八里南北九里有奇旁
有四閘古為瀦蓄灌田之備又白居易石函記
云自錢塘至鹽官界應漑夾官河田須放西湖
水入河從河入田西湖不足則決臨平湖添注

官河又酈道元水經注云靈隱山下有錢塘故縣縣側有明聖湖又合臨平湖經槎瀆而注於海合之諸說則東湖實西湖蓄水之地而上塘車戽之源利益實屬相侔但自宋代以來從無議及開濬者臣等會勘湖址僅存六百餘畝雖有湖形竟同陸地沿河盡為魚蕩田園清理既難工程復大非一時可以並舉之事應俟西湖完工日再為確議具奏再查浙江省城至江南

吳江縣接界一帶官塘運河臣等會同親勘間有淺處而德清縣轄之大麻鎮起歷石門縣至桐鄉縣轄之玉溪鎮共四十里更為淤淺半月不雨舟卽難行其支港亦多壅塞此河不特商旅往來抑且糧艘出入兼之田畝賴以車戽最關緊要急應䟽濬以通運道見在飭行布政司會同糧儲道細加丈量節省確估其開濬事宜專委糧儲道督率各官實心料理其工費亦請於

海塘捐監銀內動支統聽部議緣係奉

旨委勘事理謹將勘過情形先行題覆所有工費事宜
現在飭行布政司會同糧鹽二道逐一丈勘估
計臣謹會同浙江撫臣合詞具題伏乞

皇上睿鑒勅部議覆施行六月二十一日題七月十六
日奉

旨該部議奏欽此欽遵抄出到部工部等會議查浙江
仁和錢塘海寧三縣民田該督等既稱皆賴兩

塘河水灌漑而兩河皆自西湖流注久因沙土
多淤聽佃於民利益甚微所損民田不止鉅萬

仰請

皇上豁除糧額照舊址清出淤淺沙灘相應挑濬工費
確估核題城內之河淤淺處亦酌量開濬附入
工費報銷等語應如該督等所題將民人所占
田蕩照西湖舊址清出應徵銀米准其豁除造
冊報明戶部其湖中沙草淺淤之處應令開濬

深通使水得以停蓄其舊隄坍塌之處卽將所
挑沙草帮築堅固推原歷來淤塞不特湖中葑
草滋蔓抑由上流沙土填積應於湖裏各橋建
閘啓閉不使浮土得入湖內以礙湖流前項工
程旣稱令鹽驛道節省確估該撫核實題報准
動海塘捐監銀兩於秋成後興工工完之日仍
交鹽驛道經管該撫不時查察每年取具該道
並無淤塞甘結報部城內河道淤淺之處應開

濬者亦行酌量開濬該督等一併確估題報可也雍正二年九月二十一日題本月二十七日奉

旨依議

雍正五年三月巡撫浙江都察院右副都御史
臣李衛題為請開水利以贍民生以裕

國課事該臣看得開濬西湖原估應需工料銀
四萬二千七百四十二兩零嗣據鹽驛副使

王鈞情愿照數捐出已資修濬經前署撫臣傅敏奏明荷蒙

俞允欽遵在案先據署布政司事按察司董永艾詳稱該道著陞任杭州府知府魏定國及分理各員督率挑濬陸續興工俱於雍正四年十月二十日各工完竣至老佃新佃內有無礙源流安土難遷者不行開濬其餘徐蕩河頭小南湖等處八十五畝四分六釐查係阻塞源流亦於原估

捐項數內挑濬完竣統計原估銀內實用過銀
三萬七千六百二十九兩零造冊詳送察核題
銷至湖工雖已告竣而淤泥葑草時常生長在
所不免并請題明將此節省銀五千一百一十
三兩零置買田畝交地方官將每年所收花息
為不時疏濬歲修之費於年終造冊報查再運
河工段現在河水充足應暫停開濬仍將一切
湖河工程責令該道不時查察遇有淤塞卽行

督理修濬等因前來臣協同在省司道親加查
勘察核無異除現冊送部外理合題銷伏乞

皇上睿鑒勅部核覆施行奉

旨著察核該部知道

雍正五年二月欽奉

上諭浙江杭嘉湖三府上年秋冬之間雨水稍多收成
略覺歉薄今年青黃不接之時已令地方官商酌平
糶以濟民食但念米價雖不至昂貴而無力窮苦之

民本無糴米之資甚屬可憫著動用庫銀四萬兩令
巡撫李衛會同將軍鄂彌達觀風整俗使王國棟悉
心商酌於地方或開濬河道或修理城垣隄岸令小
民就近傭工藉以糊口倘四萬金尚不敷用著李衛
等再行具奏請旨特諭臣李衛等欽遵察勘次第奉
行是以上下兩塘支河港汊堰埭橋梁凡湖流
所屆遠近處所靡不修舉堅固䟽濬深通仰見

睿慮周詳

皇仁溥博東南水利永賴於億萬斯年矣

西湖志纂卷二

欽定四庫全書

西湖志纂卷三

大學士梁詩正等輯

孤山勝蹟

孤山 在西湖中一嶼聳立旁無聯附爲湖山

最勝處萬歷杭州府志山形坦平縣邈巍介湖

中以其不與諸山聯屬故名亦稱孤嶼又名瀛

嶼上多梅花爲宋林和靖放鶴處

張祜孤山詩
樓臺聳碧岑

一徑入湖心不雨山常潤無雲水自陰斷橋荒
蘚合空院落花深猶憶西窓月鐘聲出北林林
逋孤山寫望詩水墨屏風狀總非作詩除是謝
玄暉溪橋裊裊穿黃落樵斧丁丁隔翠微返照
未沉僧獨往長煙初淡鳥橫飛南
峯有客鋤園罷閒倚林間忘却歸

聖因寺 在孤山之南面臨明聖湖羣山環拱萬堞

平連攬全湖之勝

國朝康熙四十四年

聖祖仁皇帝省方幸浙臣民欣忭愛戴於斯地恭建

行宮

上奉

皇太后鑾輿駐蹕旬日正殿

御題扁額曰

澄觀齋

御書對聯云

雲牕靜挹峯巒秀

花徑平分松竹香
內一層

御題曰

涵清居聯云

入座煙嵐鋪錦繡

隔簾雲樹繞樓臺進東一所

御題曰

西湖山房聯云

蒼靄望中收四面湖光依几席

薰風行處遍六橋花柳間桑麻更東後一進正對吳

山

御題曰

攬勝齋聯云

花雨潤時霑翰墨

竹風清處韻琴書

御製行宮雨中望吳山詩

檻外青山縱目收
繁花初露葉新稠
更教點染煙雲色
添得牕前翠欲流

後有泉一泓名曰淳泉

御製淳泉詩

臨池懷雅則采秀在山青
每念風波息心寬與水平

四月初八日又

御製題行宮詩

歲月流光五十載
兩江風景一時榮
蟠桃果熟春光好
海屋籌添麗日明
幸有百僚分節治
嗟涼德際昇
昇平年豐物阜民安樂
何必燕京是帝京

雍正五年欽奉

世宗憲皇帝諭旨改建佛寺

欽定寺名為

聖因寺

御書扁額懸山門第一進為彌勒天王殿進內為韋馱

殿中楹恭摹

聖祖舟中臨米芾書一幀第二進為大雄殿上懸

世宗御書

澤永湖山四字內供

欽頒萬壽寶藏並世尊栴檀像東廡為伽藍殿西為
祖師殿第三進為觀音殿供大士銅像第四進
為

殿門第五進為

正殿恭奉

聖祖神御龍牌俾萬世臣民敬謹瞻禮迤東為官客堂
為禪堂為齋堂為香積厨更東為大悲閣為第
一樓西為方丈為法堂雍正十一年

欽命悟修禪師來主法席焚修徒侶至者日衆官給田
以供齋米並於六橋隄上俾藝果蔬以資日用
由是餅鉢之需不待外求帝釋精藍獨尊於鹿

苑珠林之上矣

陳元龍遊 聖因寺西湖山房
詩當年奉輦趨 行殿此日安

禪憩上方嵐翠迴圓仙仗合湖波遙溯

聖

恩長人天共引朝元路帝釋宏開選佛場不用

蓬山羨兜率龍宮原在水中央嵇魯筠元日恭

謁 聖因寺詩江海朝宗日湖山結勝因仁祠

千載盛福地萬方均玉帛承王會乾坤轉法輪

春光滿瀛嶼稽拜肅簪紳臣沈德潛攬勝齋恭

賦 六龍昔日 巡行地今是孤山古佛家暮

鼓晨鐘參白足瑤林瓊樹吐丹葩 天書瑰

瓊懸銀榜父老歡呼憶
翠華每到雲林頓攬勝嵐光湖影浩無涯

聖因行宮 乾隆十六年

皇上法

祖勤民特舉

省方之典

親奉

皇太后鑾輿

巡幸江浙

駐蹕西湖全浙臣民懼怵踴躍恭建

行宮於

聖因寺西適當孤山正中羣山環衛拱護

宸居萬井東連遙瞻

闕闔規制天成不施丹雘而日華雲爛萬象光昭

聖情豫懌

御題正殿之額曰

明湖福地

御製對聯云

雲嵐靜對自高秀

城郭遠映餘青蒼

進內為垂花門

御題第二層殿額云

月波雲岫

後有園拾級而登直達孤山之頂有亭歸然湖

光山色環繞輝映

御題曰

四照亭亭下修竹萬竿清陰茂密五六月間無暑氣

御題曰

竹涼處循曲徑而西卉木扶踈嵐光曖曖蒼翠欲滴

御題曰

綠雲徑南為步廊花石璽瓏䟽通旁達前有樓高

倚天半

御題曰

瞰碧樓樓下文石為臺俯臨曲沼有泉出崖石間
演清漾碧上過天光

御題曰

貯月泉泉側叢桂常青花時天香馥郁子落如瓊
瑤墜砌舊志所稱月中桂也惟靈鷲山中有之

御題曰

驚香庭庭後傑閣連雲聳峙霄漢

御題曰

領要閣啓扉而入高館崇闕中樹玉蘭數本一名
望春恭值

翠華巡幸萬卉爭榮獨此花先茂遠望如瓊樓玉宇
御題曰

玉蘭館館右山徑逶迤有石壁卓立潑翠流丹

御題曰

繡壁空青其上恭建

御碑亭敬摹

御製聖因行宮卽景詩

見恭紀
名勝

宸章璀璨琬琰名山與璇圖並鞏永符明聖之瑞應

云

臣
錢陳羣恭和

御製聖因行宮卽景元韻

聖蹟傳因啓鳳阿春風重見

六龍過雨滋蕙徑含芳早風轉筠廊夏玉多紅葯漫
催婪尾宴綠楊齊蘸鴨頭波高枝自愛流鶯好
不在調笙與按歌

遵海而南道不紆省耕恰喜駐西湖歲方降福
穰穰也民莫能名蕩蕩乎山水自居天下最文
章深與性靈俱正逢

慈聖無疆壽受日春長恆勝娛

臣沈德潛恭和

御製西湖行宮八景元韻

四照亭

突兀最高頂空亭四望中
全收湖影碧小綴砌
花紅山繞層層障襟披面面風

皇情娛勝賞送目總難窮

竹涼處

一徑萬竿綠人心到此涼
陰陰疑滴雨細細欲
生香深處聞鳥語踈邊漏日光
可宜攜枕簟消

受夏天長

綠雲暹

是徑皆添綠無林不起雲鶴衣沾翠潤棋語帶
風聞古幹綠蘿蔓高坡蝕蘚紋閒行疑世外何
處有翫紛

瞰碧樓

雲際置身高推牕俯素濤聊憑湖淥靜暫息
聖躬勞玩此鳧鷖樂因懷嵇阮曹會心因得句

天子是詩豪

貯月泉

圓影入平池一泓恰受之虛明兩無著蕩漾總
相宜方寸靈臺湛高天宿霧披鏡花同會悟坐
玩故遲遲

鷺香庭

鷺嶺連蜷質庭前樹樹芳秋高因起粟中美自
能黃

用子服
惠伯語

種豈從天下花因浥露涼吾無隱

乎爾悟得木犀香

領要閣

湖山獻奇巧一一難探窮
領略會其要自得陶
潛風放眼迹象外游心空明中

聖人觀物妙寧與常人同

玉蘭館

壓樹堆殘雪辛夷別種開
輞川傳舊館

天藻發新裁月白花難辨
香清蝶不來為楣聞屈子

應重楚中材

自 聖因寺東沿白沙隄至段橋為孤山東路
關帝廟 在聖因寺東錢塘縣志俗名照膽臺
前有三義閣後有清嘯亭舊貯玉印一顆文曰
漢壽亭侯印瓦紐相傳為神所佩又有石刻畫
竹傳是神筆以竹葉繪成詩字

白沙隄 俗稱白公隄自孤山至斷橋徑三里
餘唐稱白沙隄宋稱孤山路咸淳臨安志東有

斷橋北有西泠橋白樂天詩誰開湖寺西南路
草綠裙腰一道斜自注云孤山寺路在湖洲中
草綠時望如裙腰舊志云不知所從始萬曆錢
塘縣志歲久隄圯萬曆十七年司禮監孫隆纒
石砌築雜植花木更名十錦塘隄中重建望湖
亭并建錦帶橋

國朝雍正四年奉

旨瀋湖出湖中葑草運於各舊隄之上加廣丈餘加高

二尺鋪沙甃石視昔加整補植桃柳間發芙蓉
爛如錦屏行人嬉遊魚鳥咸若洵無日不在光

風熙皞中也

巨謹按自宋咸淳間潛說友作臨安志後吳自
牧作夢梁錄周密作武林舊事明洪武時陳循
作寰宇通志成化中夏時正修杭州府志俱稱
孤山路嘉靖中田汝成作西湖遊覽志萬曆中
陳善修杭州府志並失載孤山路而白沙隄之
名遂泯至萬曆中錢塘令聶心湯作縣志從俗
稱白公隄而後之修志者咸指此隄為白公所
築不知白詩有綠楊陰裏白沙隄之句則白公
之前已有
此隄矣

褒忠亭 在孤山路口關帝廟左為前分巡溫處道陳丹赤建丹赤死祖弘勳之難康熙三十

三年

詔贈通政司通政使諡忠毅

聖祖仁皇帝御書名垂青史四字

賜之因建是亭

龍王廟 在白沙隄孤山路口咸淳臨安志舊在寶石山下名嘉澤龍王祠梁大同間建號錢

塘湖龍君吳越錢氏表請封廣潤龍王乾道五年安撫周淙以禱雨應徙建於壓隄橋名水仙王廟後以樂天和靖子瞻三賢祔祀廟中錢塘縣志淳祐八年安撫趙與憲建亭其前之井扁曰寒泉名其井曰薦菊取蘇軾詩不然配食水仙王一盞寒泉薦秋菊之義後廢別祀三賢於孤山明嘉靖二十三年郡守陳仕賢因禱雨輒應重構望湖亭而祀之復圮萬曆十四年杭守

俞良樞重建

國朝康熙三十八年恭建

御書平湖秋月亭徙廟於亭後廟燬雍正五年重建於此以復水仙故跡

陸宣公祠 在孤山路口祀唐宣公陸贄萬厯杭州府志孤山舊有宣公祠隆慶二年巡按御史謝廷傑卽舊祠改祀漢嚴光以下十一人而徙宣公像於祠前之恩綸閣顏其額曰西湖書

院錢塘縣志天啓五年奏毀天下書院惟陸贄
祠堂著行改正仍歸陸氏世守

國朝雍正九年重修坊表乾隆十六年春

聖駕巡幸

御題扁額曰

內相經綸

御製陸宣公祠詩

策馬孤山脚崇祠陸氏傳去留關治亂事業付雲

煙房相希前躅蘇公表舊編德宗事苛察胡獨昧
知賢

平湖秋月亭 在孤山路口舊名望湖亭後為龍王
廟康熙三十八年

聖祖仁皇帝御書平湖秋月為西湖十景之一遂建亭
於此乾隆十六年春

聖駕南巡

御製平湖秋月詩

見恭紀
名勝紀又

御製湖月一首

江月妙在流湖月妙在渟纖阿如駐御詆蕩窺澄
泓軒轅鑄明鏡萬古銅暈青於中金一點沉光奪
斗星文漪漾不去素彩寒欲生未秋景已佳坐花
漢影橫

臣沈德潛恭和

御製平湖秋月元韻

不比春波綠似油一船載月櫓聲柔空明蕩漾

忘歸去看取平湖似不流

勾留處 前浙江巡撫范承謨陞任福建總督
去浙時嘗取白詩未能拋得杭州去一半勾留
是此湖之勾書勾留處於湖心亭康熙三十八
年

聖祖仁皇帝臨幸西湖

御書亭額遂移范書於孤山放鶴亭之南建亭以懸之
邦人懷承謨舊澤猶稱范公書院云

放鶴亭 在孤山之北宋和靖處士林逋故廬
有墓在焉上有古梅相傳為逋手植後多不存
元至元間儒學提舉余謙旣葺處士之廬補植
梅花數百本構梅亭於其下郡人陳子安以一
鶴放之遂構鶴亭後並廢明嘉靖間重建歲久
圯

國朝康熙十二年巡撫范承謨重葺布政司李之
粹榜曰林君復放鶴處三十五年

聖祖仁皇帝御書放鶴二字為額因建放鶴亭又奉御書舞鶴賦勒石建亭於放鶴亭之上三十八年復

巡幸斯亭

御製五言詩一首

見恭紀
名勝

乾隆十六年春

聖駕臨幸

御製放鶴亭詩

見恭紀
名勝

巢居閣 在放鶴亭後成化杭州府志林處士

居有巢居閣元浙江儒學提舉李祁重建後圯

明成化十一年浙江左布政使甯良重建

林逋小隱

自題竹樹遶吾廬清深趣有餘
鶴閒臨水久蜂懶得花踈
酒病妨開卷春陰入荷鋤
常憐古圖畫多半寫樵漁
又巢居閣偶書遶舍青山看不
足故穿林表架危軒但將松籟
延佳客常帶嵐霏認遠村
吳榜自能凌晚汰湘纍何事屬芳蓀
餘生多病期恬養聊此棲遲一避喧
又巢居閣絕句山水未深猿鳥少
此生猶擬別移居直過天竺溪橋上
獨樹為橋小結廬

國朝康熙三十五年因葺放鶴亭重建

處士橋 在放鶴亭西巢居閣前西湖遊覽志

孤山之北其巔為歲寒巖其下有處士橋

敬一書院 在孤山四賢祠之右康熙二十四

年巡撫趙士麟建每月之朔集紳士耆老宣講
聖諭於此望日會師儒以講學後擢去士民卽以祠
之

四賢祠 在孤山之陽祀唐刺史李泌白居易
宋守蘇軾處士林逋西湖遊覽志唐民懷白公
之德卽孤山廣化寺以祀公至宋益以蘇公林

公名三賢堂萬厯杭州府志寶慶間府尹袁韶
徙建於蘇隄後圯淳祐中祔祀水仙王廟明天
順間知府胡濬徙建今處正德元年知府楊孟
瑛增鄴侯李泌改稱四賢祠祀以春秋

范忠貞祠 在孤山四賢祠左祀前浙江巡撫
謚忠貞范承謨錢塘縣志承謨順治壬辰進士
以學士出撫浙江多惠政陞福建總督死耿逆
之難浙人哀思建祠崇祀歲給學租銀春秋有

司致祭

古文昌祠 在四賢祠右

錦帶橋 在白沙隄中間隄南為前湖隄北為

後湖亦稱裏湖中開一港以通舟楫疊石為梁橫跨

十錦塘望若錦帶故名

聖祖仁皇帝臨幸孤山

御舟由此轉入後湖改架木梁雍正八年重甃以石

臣謹按西湖遊覽志載斷橋稍西有涵碧橋在孤山路中宋轉運使陳堯佐重修而不載錦帶

橋考十錦塘之名始於萬厯間司禮監孫隆修
白沙隄而易其稱者嘉靖作志時有涵碧而無
錦帶明矣隆修隄甃石因十錦塘而名
其橋曰錦帶則錦帶當即為涵碧無疑

斷橋 一名段橋在孤山路口西湖遊覽志斷

橋本名寶祐橋唐時呼為斷橋張祐詩云斷橋

荒蘚合是也橋隄烟柳葱蒨露草芊綿望如裙

帶元錢惟善竹枝詞有段家橋之名聞者疑為

杜撰然揚薩諸詩往往亦稱段橋未為無據也

橋口舊有宋時總宜園取蘇詩淡粧濃抹總相

宜之意今不存

斷橋殘雪亭 在斷橋之上奉懸

聖祖仁皇帝御書扁額復恭摹勒石建

御碑亭於橋左為西湖十景之一乾隆十六年春

聖駕南巡

御製斷橋殘雪詩

見恭紀
名勝

臣沈德潛恭和 元韻

段家橋邊積素餘樵蹤欲斷將焉如山人僵臥

不能起裹飯于今有子輿

自 聖因寺西經蘇隄合趙隄楊隄至湖心

亭為孤山西路

朱子祠 在孤山之陽錢塘縣志舊在錦塢山
額題紫陽書院明督學蘇濬喬因阜先後錄其
裔孫以守祠祀動支仁和縣學租遣官致祭

國朝順治丁酉以錦塢山峻歲久傾圮巡撫陳應
泰巡按御史王元曦提學僉事谷應泰移建今

處春秋有司致祭

報恩院 在白沙隄之西舊名盧舍菴錢塘縣

志明萬厯間司禮監孫隆建

國朝順治己丑上方院盧九德重修立柵水中禁
人捕魚以為西湖放生之所遂名盧舍菴康熙
五十五年織造孫文成改建更今名

六一泉 在孤山西南即唐孤山寺

白居易西湖晚歸回

望孤山寺詩柳湖松島蓮花寺晚動歸橈出道
場盧橘子低山雨重柵欄葉踐水風涼烟波澹蕩

掛空碧樓閣參差倚夕陽到岸請君回首望蓮
菴宮在水中央林逋孤山寺寫望詩底處憑欄
思渺然孤山塔後閣西偏陰沉畫軸林間寺零
落棋枰葑上田秋景有時飛獨鳥夕陽無事起
寒烟遲留更愛吾廬近
祇待重來看雪天 咸淳臨安志陳天嘉元年

改建名永福西湖遊覽志宋大忠祥符間改為

廣化寺內有辟支佛骨塔柏堂竹閣皆在焉紹

興間改創四聖延祥觀理宗時復改西太乙宮

錢塘縣志元楊璉真伽改為萬壽寺元末燬明

洪武初誠意伯劉基復建易名六一泉因蘇軾

守郡時與僧惠勤懷歐陽公泉出講堂下遂名六一自宋迄元泉沒於二氏之居久矣元季兵燹泉始呈露復構石亭以覆之揭為寺額歲久圯崇禎甲申重修仍名廣化外構數峯閣以祀自漢迄明諸先賢又圯

國朝康熙初重建復名六一泉

蘇軾六一泉銘見藝文

柏堂 咸淳臨安志陳文帝天嘉二年建廣化寺寺有當時所植二柏其一已枯東坡作孤山

二詠序云柏二株其一為人所斫山下老人自為兒時已見其枯矣然堅悍如金石愈於未枯者僧志詮作堂久廢今基在西太乙宮有孝宗

御書軾詩刻石覆以小亭

蘇軾柏堂詩道人手種幾生前鶴骨龍姿

尚宛然雙幹一先神物化九朝三見太平年忽驚華廈依巖出乞與嘉名到處傳此柏未枯君記取灰心聊伴小乘禪

竹閣 咸淳臨安志舊在廣化寺柏堂之後有

小閣多植竹白公居易嘗偃息於此遂名今與

寺俱徙

白居易宿竹閣詩晚坐松窓下宵眠竹閣間清虛當服藥幽獨抵還山巧未能

勝拙忙應不及閒無勞別脩道只此是玄關蘇軾孤山竹閣詩海山兜率兩茫然古寺無人竹滿軒白鶴不留歸後語蒼龍猶是種時孫兩叢却似蕭郎筆千畝空懷渭上村欲把新詩問遺像病維摩詰更無言又竹閣憶樂天翁詩柏堂南畔竹如雲此閣何人是主人但遣先生披鶴覺不須更畫樂天真

瑪瑙坡

萬曆杭州府志在孤山東咸淳臨安

志地有碎石文瑩若瑪瑙狀故名西湖遊覽志

舊有瑪瑙寶勝院院內閒泉僕夫泉皆僧智圓

所鑿圓字無外號中庸子與林逋為友

詳見北山

參寥泉

西湖古蹟事實在孤山舊智果院蘇

軾守杭與僧道潛號參寥子遊故名

詳見北山

金沙井

咸淳臨安志在孤山廣化寺白居易

嘗酌此泉甘美視其沙燦如金色故名

四聖延祥觀

西湖遊覽志宋紹興間建以沉

香刻四聖像飾以大珠備極工麗為園曰延祥

亭館窈窕儼若圖畫

西太乙宮 西湖遊覽志宋理宗時稱五福太
乙臨吳越之分卽延祥園建太乙宮內有瀛嶼
白蓮堂蓬萊閣香月亭等勝其殿曰黃庭即涼
堂故址四壁有蕭照所畫山水成化杭州府志
嘉木楊喇勒智改為寺至正庚子燬

臣謹按舊志所載孤山古蹟如柏堂竹閣及金
沙井延祥觀太乙宮皆稱在廣化寺卽今之六
一泉雖舊址已湮而其地尚在惟瑪瑙坡僅稱
在孤山東參寥泉僅云在智果院今坡與院皆
無踪跡可考而瑪瑙智果兩寺已移在北山寶
雲山下他如西閣辟支塔報國寺學士溝及斷

橋西之總直園皆廢久無可指實
僅據舊志錄存其名以還故蹟云

歲寒亭 遂昌雜錄孤山之陰有一亭在高阜

處名曰歲寒繚亭皆古梅

程鉅夫題歲寒亭詩
吾廬不暇理且復理

斯亭風雨連天白雲山送我青蒼龍千歲
質白鶴九霄翎相與成三友年年聚德星

挹翠閣 遂昌雜錄閣臨水上下皆拱斗砌成

極為宏麗建西太乙宮時所創

西泠橋 在孤山路西北西湖遊覽志一名西

林橋又名西陵橋從此可往北山武林舊事亦

名西邨都城探春先南後北至午則盡入西邨
并陽老人詞云看畫船盡入西邨閒却半湖春
色指此

乾隆十六年春

駕幸西湖

御製西泠橋詩

玉竦橫分裏外湖綠絲風裊柳千株漾舟謁想前
朝蹟賢守風流白與蘇

諾公祠 在西泠橋西祀鎮浙將軍宗室諾羅
布將軍恤兵愛民

聖祖仁皇帝南巡

御書天潢維翰四字

賜之後浙民請祠於西湖之濱祠內有君子泉敦詩說

禮堂

君子泉 武林舊事定業院有君子泉兩湖塵
談北山鳳林寺後有乳泉頗甘冽峭壁側立涵

以石池石上刻君子泉按鳳林本唐喜鵲寺而
武林舊事又稱泉在定業院寺與院皆烏窠禪
師道場二地相去不遠故指院以為寺歟錢塘
縣志今在諾公祠內

蘇隄 在西泠橋西上有六橋自南新路接北
新路橫截湖中宋元祐間蘇軾築楊慎蘇隄本
末東坡既奏開湖周視湖上曰今欲去葑田而
葑泥如雲安所置之湖南北周迴三十里環湖

往來之民或終日不達若取葑草積之湖中為
長隄以通南北則葑去而行者便矣隄成杭人
稱曰蘇公隄祠公隄上西湖遊覽志沿隄夾植
花柳中為六橋橋各有亭以覆之自是湖分為
兩西曰裏湖東曰外湖南渡後隄橋成市走馬
遊船絡繹不息歲久弗治隄漸廉削成化以前
裏湖盡為民業六橋水流如綫知府楊孟瑛闢
之增築湖隄列植萬柳頓還舊觀

國朝雍正四年開濬西湖與白沙隄同時修築輔
狹為廣增庫為高視白沙隄倍之乾隆十六年

春

聖駕巡幸

御製蘇隄詩

白沙隄上昨鳴鞭瀟灑詩情憶樂天豈意千秋留
姓氏白公不及大蘇傳

一株楊柳一株桃夾鏡雙湖綠映袍蓄眼韶光看

不足北高峯影接南高

跨虹橋 即蘇隄第六橋西湖遊覽志蘇隄之

橋次第自南而北楊隄之橋次第自北而南第

六橋與西岸第一橋斜對稍北則為西泠橋

曲院風荷亭 在蘇隄跨虹橋西康熙三十八年

聖祖仁皇帝御書曲院風荷為西湖十景之一遂建亭

其處內有迎薰閣東為望春樓乾隆十六年春

聖駕南巡

御製曲院風荷詩

見恭紀
名勝

臣沈德潛恭和元韻

院落迴環巧貯風水花真奪晚霞紅明粧短棹
穿花去一路歌聲訝許同

崇文書院 在跨虹橋西明萬厯間巡鹽御史
葉永盛視釺之餘集內商子弟於跨虹橋西授
以題命各就舫中屬文舫皆散去少焉畫角一
聲羣舫畢集各以文進面定甲乙名曰舫課去

官後高士思之就其地建書院中奉朱子而以
後寢祀永盛凡舫課皆櫝其文於齋使者評隲
焉

國朝康熙四十四年

聖祖仁皇帝南巡

御題正學闡教四字

賜為額爰鼎新之榜曰崇文中為饗堂闢其左為亭恭
摹

御書勒石崇奉後為敬修堂為諸生齋舍雍正十一年
重修延師督課朔望會文民商咸集規制大備
西湖書院 明成化間布政使甯良建延大理
卿夏時正居之名孤山書院卽西太乙宮故址
也建書庫捐膳田以待四方學者又名西湖書
院歲久圯

國朝康熙二十五年督學王掞於跨虹橋之西重
構為講學之所仍名西湖書院後講學久廢乾

隆八年併入崇文書院

湖山神廟 在跨虹橋西祀湖山之神雍正九年浙江總督李衛創建

竹素園 在湖山神廟西雍正九年廟成遂於廟右闢地為園創建亭宇十年恭奉

世宗憲皇帝御書竹素園三字額懸正廳內有流觴亭水月亭臨花舫觀瀑軒聚景樓俱擅湖山之勝
乾隆十六年三月

聖駕臨幸

御製竹素園詩

見恭紀
名勝

東浦橋

即蘇隄第五橋通曲院港西湖遊覽

志第五橋與西湖第二橋對宋周紫芝韓園讌
集詩遙知第五橋邊路桐葉題詩人未歸

趙隄

宋時稱小新隄路通靈竺咸淳臨安志

淳祐二年安撫趙與憲築自北山第二橋至麴
院夾植花柳如蘇隄隄半作四面堂為亭三以

比蘇隄人遂稱趙公隄西湖遊覽志隄旁舊有
天澤廟小隱園裴園史園喬園資國園並廢

天澤廟 西湖遊覽志在趙隄旁祀履泰將軍

孫顯忠顯忠錢塘人仕吳越嘉熙間京尹趙與
權禱雨有應奏封天澤侯內有天澤井葛仙翁
虬松資國園卽將軍故宅也

小隱園 西湖遊覽志宋內侍陳源之外宅後
收入重華宮改建崇福院前有雙岸金沙澗裴

園裴禧別業史園史徽孫別業喬園喬又聞別業

臣謹按趙隄故址湮廢已久其隄旁天澤廟小隱園及裴園史園諸處在嘉靖間作遊覽志時俱稱並廢則隄之不存可知其所云自北山第二橋至趙院以通靈竺者北山第二橋即東浦橋也蓋自南而數為第五自北而數則為第二趙院原在金沙澗旁宋時取澗水以造趙路通靈竺今新築之金沙隄卽其處也故存其名以還舊蹟

金沙隄 在蘇隄東浦橋南自東迤西與楊隄故址相屬其地為靈隱澗泉入湖之處舊為淺

灘俗呼金沙灘數十年來金沙漸淤積成廣區
雍正九年總督李衛建祠以祀關帝遂於東浦
橋之旁築新隄以達祠宇隄廣三丈長六十餘
丈夾植桃柳與蘇隄聯絡映帶遂名金沙隄
玉帶橋 在金沙隄上雍正九年因築新隄建
橋其上以通六橋之車馬裏湖之舟楫港中溪
流湍激設三洞以醜水狀如帶環故名玉帶乾
隆十六年春

聖駕巡幸

御製玉帶橋詩

見恭紀
名勝

關帝祠 在金沙港雍正八年浙江總督李衛
因港中灘沙漲成平陸創建神宇中為祠門三
楹外照面樓三楹進內儀門三楹饗堂三楹更
進為正殿三楹後寢五楹上構岑樓下接水軒
左右廂樓各五楹後臨湖面環以迴廊朱欄掩
映闕祠西為園由正殿統步廊啓徑而入疊石

為山疏泉為池雜蒔卉木創建亭宇軒檻瓊瓏
欄楯銜接內有觀瀾亭垂釣亭薔薇洞瓊花島
及星橋月榭諸勝湖上關帝祠凡數處規制宏
敞以此為最

寶勝菴 在關帝祠西為雲林下院

魚籃觀音院 在金沙澗路口舊錢塘縣志宋
時建路通行春橋

金沙澗 卽靈隱山北澗之水流入西湖處澗

沙明淨作黃金色故名金沙入湖漸成深廣遂
稱港焉其淺陂則稱金沙灘居民皆以捕魚為
業網罟之外多放鷓鴣以取魚爾雅所謂鷓鴣
嘴曲如鈎食魚者是也乾隆十六年春

駕幸西湖

御製鷓鴣詩

鷓鴣本野鳥食魚以自活一被漁師得鍛羽如受
刑以繩縛其頸驅之捕鱸鰕將謂得果腹豈知不

下咽冥然猶不悟長此安能脫鷓鴣爾特愚漁師
爾特黠格物可會心海鷗信明達

歷隄橋

即蘇隄之第四橋通茅家埠西湖遊

覽志第四橋與西岸之第三橋對橋下水極深
凡入靈竺舟行必取道於此故橋旁設石臺籠
燈以照夜船舊有水仙王廟亦名龍王祠前有
井曰薦菊後圯移建於望湖亭劉渙詩重到桃

花第四橋

臣謹按水仙王廟本伍胥祠胥浮尸江上吳人稱爲水仙見越絕書唐乾寧間封吳安王因有水仙吳王之稱蘇軾詩配食水仙王蓋謂配食子胥耳至嘉澤龍王木號錢塘湖龍君錢鏐奏封廣潤龍王廟在寶石山乾道間安撫周淙徙於蘇隄第四橋名水仙王廟後人因稱龍王祠遂以龍王爲水仙矣

蘇隄春曉樓 在蘇隄第四橋之南康熙三十八年

聖祖仁皇帝御書蘇隄春曉爲西湖十景之首恭建

御碑亭雍正八年浙江總督李衛以亭隘不稱瞻仰改

建岑樓崇奉

奎章復建曙霞亭於後乾隆十六年春

聖駕南巡

御製蘇隄春曉詩

見恭紀
名勝

臣沈德潛恭和 元韻

誰築長隄記大蘇春光曉色接林廬分明海上
方蓬景倒影樓臺入半湖

望山橋 卽蘇隄第三橋通花家山港西湖遊

覽志第三橋與西岸第四橋斜對水名花港所

謂花港觀魚者是也舊有雪江書堂宋淳祐中
婺州人胡伉充三賢堂長自號雪江因名今廢
鎖瀾橋 卽蘇隄第二橋通赤山麥嶺路西湖
遊覽志第二橋與西岸第五橋對舊有湖山堂
宋京尹洪燾建又有三賢堂宋京尹袁韶建以
祀白蘇林三公後有堂三曰水西雲北曰月香
水影曰晴光雨色久廢

映波橋 卽蘇隄第一橋通赤山教場西湖遊

覽志第一橋與西岸第六橋斜對舊有旌德觀
本定香寺址今止存定香橋徐集孫西湖納涼
詩小艇撐過第六橋

花港觀魚亭 在蘇隄映波橋之北康熙三十八年

聖祖仁皇帝御題花港觀魚為西湖十景之一建亭其
處乾隆十六年春

聖駕南巡

御製花港觀魚詩

見恭紀
名勝

臣沈德潛恭和 元韻

彎彎野岸圍清港
滄滄游魚啖落花
物我兩忘
同一樂要將此意問南華

旌德先賢祠 在蘇隄第一橋南
夢梁錄寶慶二年府尹袁韶請於朝以杭會湖山清麗人傑
代生請建祠以祀陶唐至宋本郡人物許箕公
以下三十一人列女孫夫人等五人賜額曰旌
德觀錢塘縣志後燬今徙建城內保安坊

楊隄 在裏湖西岸與蘇隄相對西湖遊覽志
正德間知府楊孟瑛既開西湖遂築此隄增築
六橋俗稱裏六橋是也然近北山三橋宋時已
有之孟瑛所築特南山三橋耳

國朝雍正四年開濬西湖重加修築亦如白蘇二
隄緣在裏湖經行者稀且近居民田桑之地故
不復補植花木云

環壁橋 裏六橋之隄北第一橋西湖遊覽志

第一橋近淨空院玉泉之水出焉題曰環壁自此而西可通耿家埠

流金橋 裏六橋之第二橋西湖遊覽志第二橋金沙澗水出焉題曰流金自此而西可通麴院路

臥龍橋 裏六橋之第三橋西湖遊覽志第三橋地近龍潭深黝莫測有時祥光浮水面蓋神龍之所窟宅也題曰臥龍自此而西可通茅家

埠

隱秀橋 裏六橋之第四橋西湖遊覽志第四
橋遶丁家山而東沿隄屈曲蒼翠掩映題曰隱
秀自此而西可通花家山

景行橋 裏六橋之第五橋西湖遊覽志第五
橋西挹高峯橋畔舊有三賢祠在焉題曰景行
從此而西可通麥嶺路

濬源橋 裏六橋之第六橋西湖遊覽志第六

橋從定香橋而入近發祥祠虎跑珍珠二泉之水出焉其源長矣非濬導不可題曰濬源

湖心亭 居全湖中心浙江通志舊有湖心寺

寺外三塔鼎峙明弘治中寺燬塔亦湮廢嘉靖間知府孫孟尋遺址建亭萬曆四年按察僉事徐廷祿重建有太虛一點宛在水中央之額後司禮監孫隆升為重簷題曰喜清閣萬曆錢塘縣志湖心寺外三塔其中塔南塔並廢卽北塔

基建亭名湖心亭

張萱湖心亭詩
張玉周遭澹
欲無三潭深處一亭孤
踈鐘

度水寺邊寺野艇依林湖外湖日落雲容渾自
懶春來花氣未全蘇開樽不用邀明月已探驪
龍頷下珠王寅湖心亭詩
雨後湖波嫩轉嬌
銀盤裏坐吹蕭四圍蘭漿三千頃
雙帶桃花十
二橋亭
歷蛟宮翻晚照沙沉塔廟說前朝
虛亭
鷗鳥時來往自識閒情不用招
方九叙湖心亭
詩
滄波縈繞小亭幽
來往惟憑一葉舟
三塔已
沉青草沒兩峯
相對黛烟浮
潭心影動疑鮫室
風裏翬飛似
蜃樓何用乘
槎
霄漢去藏鴉門外即瀛洲

國朝康熙二十八年

聖祖仁皇帝南巡

御題扁額云

靜觀萬類奉懸亭中又亭聯云

波湧湖光遠

山催水色深

又於樓上

御題云

天然圖畫奉為額雍正五年增建敞堂三楹堂後復
構水軒架於湖面雕甍貼水丹楹凌雲乾隆十

六年春

聖駕巡幸

御製湖心亭詩

見恭紀
名勝

臣錢陳羣恭和 元韻

天影相涵駐碧空
霓旌搖曳古槎通
水中砥
與水中吐蓮葉西來蓮葉東
玉宇瓊樓元在月
方壺員嶠漫隨風
憑欄得句

宸襟霽洵有鳶魚趣不窮

臣沈德潛恭和 元韻

亭臺無地遠涵空
水鏡烟開有權通
三面總圍

山遠近

獨缺州城一面

四隅莫辨水西東
魚跳瑤砌疑

濺雨燕入珠簾巧
避風來往請君還
送目方蓬

縹緲景難窮

西湖志纂卷三